

Puspè in Rumantsch en suprastanza

Associazion da las vischnancas svizas

■ (anr) L'Associazion da las vischnancas svizas ha salvà la radunanza generala da quest onn l'emna passada a Lozana. Tala è stada dal tut en l'ensaina da las elecziuns. Cun la fin da la perioda d'uffizi 2012–2016 èn na main che sis suprastants sa retratgs. Tranter quels sa chatta era – suenter diesch onns appartenenza – la vicepresidente da l'Associazion, deputada **Silvia Casutt-Derungs**, anteriura presidenta communal da Falera. Sco successur è deputà *Daniel Albertin*, president communal dad Albula/Alvra, vegnì tschernì. Sin ina Rumantscha suonda pia in Rumantsch ed anc da la medema partida (pcd). En tut ha la suprastanza da l'Associazion da vischnancas svizas 15 commembers ord tuttas regiuns linguisticas svizas e stat sut il presidi da cuss. dals chantuns *Hannes Germann* (SH).

Silvia Casutt tira ina bilantscha positiva

Sco quai ch'ins po leger en la novissima ediziun da l'organ uffizial da l'associazion «Vischnanca svizra» ha la direcziun engrazià als suprastants partents per lur grond engaschi. Per ch'els possian trair ina bilantscha als èn vegnidas tschentadas quatter dumondas: Davart la bilantscha, stà il pli impurtant, las sfidas per ils onns vegnents e tge ch'ins spetga en l'avegnir da l'associazion? Sin questas dumondas ha deputada *Silvia Casutt-Derungs* respundi resumadamain sco suonda:

L'associazion da vischnancas è ina impurtanta partenaria en il process da legislaziun ed en las gruppas da lavur da la confederaziun sco represchentanta dals interess da las vischnancas. La lavur è zunt interessanta ed ils temas multifars. Ils interess da tuttas vischnancas – ch'ellas sajan en muntogna u en la Bassa, grondas u pitschnas – vegnan represchentads consequentamain. Casutt tira ina bilantscha fitg positiva da ses



President communal e deputà Daniel Albertin remplazza deputada Silvia Casutt-Derungs en la suprastanza da l'Associazion da vischnancas svizas. MAD

commembradi durant diesch onns en suprastanza.

Ina gronda sfida è stada la cooperaziun en la Gruppa da lavur per il concept spazial en Svizra ed en quella ch'ha gè d'elavurar la lescha executiva davart l'iniziativa d'abitaziuns secundaras. Il barat dad opiniuns tranter presidents communs da diversas vischnancas e chantuns è stà da grond avantatg per la lavur en l'atgna vischnanca.

Las vischnancas n'astgian dentant betg vegnir degradadas ad organizaziuns executivas da chantuns e confederaziun. En vischnanca vegn politisà fitg datiers als vischins. Lur dretgs da condecisiun ston restar gronds. Las pretensiuns a las vischnanca creschian, savens senza ch'ins mettia a disposiziun ils meds finansials. Na ina leva chaussa.

L'Associazion da vischnancas svizas to era s'engaschar en l'avegnir consequentamain per ils interess da las vischnancas – e quai mintgamai tenor lur basegns. Uschia po – tenor Casutt – l'Associazion da vischnancas svizas restar in partenari indispensabel per mintga vischnanca.